

UMK JADI TUAN RUMAH BERSAMA ANJUR PERSIDANGAN IBIMA KE-20



KUALA LUMPUR 25 Mac – Universiti Malaysia Kelantan (UMK) sedang giat melaksanakan pelbagai program kerjasama di peringkat antarabangsa bagi meningkatkan usaha perkongsian kepakaran dan maklumat memandangkan cabaran maklumat yang semakin mencabar.

Dalam usaha itu, pengajuran *The 20th International Business Information Management Conference (IBIMA)* yang dihoskan oleh Universiti Malaysia Kelantan (UMK) dan IBIMA Publishing, Amerika Syarikat, adalah bertujuan untuk berkongsi pengalaman dan perkongsian ilmu maklumat dalam pelbagai aspek termasuklah keusahawanan dan perniagaan.



Naib Canselor UMK, YBhg. Prof. Datuk Dr. Raduan bin Hj. Che Rose, berkata, usaha yang diambil oleh Fakulti Keusahawanan dan Perniagaan (FKP) menjadi pengajuran bersama dengan IBIMA yang merupakan sebuah badan yang terkenal dalam penerbitan jurnal penyelidikan bertaraf antarabangsa adalah bertepatan dengan hasrat Universiti dalam menghadapi cabaran globalisasi.

Beliau berkata, perkara ini boleh dilakukan dengan mengenal pasti beberapa program di peringkat antarabangsa yang boleh dimanfaatkan untuk mengukuhkan kedudukan Universiti dalam kerangka melahirkan modal insan berilmu dan berdaya saing untuk mencapai wawasan negara 2020 dan seterusnya membentuk negara yang lebih maju.

“Persidangan antarabangsa ini adalah amat penting yang merujuk kepada pelbagai tema utama dalam semua bidang terutamanya berkaitan dengan perniagaan dan keusahawanan,” katanya.

Beliau berkata demikian pada ucapan Persidangan IBIMA Ke-20 yang bertemakan *Entrepreneurship Vision 2020: Innovation, Development Sustainability and Economic Growth*, di sebuah hotel di Kuala Lumpur, pada 25 Mac 2013.

Hadir sama, Presiden IBIMA, YBhg. Prof. Madya Dr. Khalid bin Soliman, Timbalan Naib Canselor (Akademik dan Antarabangsa), YBhg. Prof. Dr. Roselina binti Ahmad Saufi, Dekan FKP, YBhg. Prof. Dr. Mohamed Dahlan bin Ibrahim dan Timbalan Dekan Fakulti Geoinformasi dan Hartanah, Universiti Teknologi Malaysia, YBhg. Prof. Madya Dr. Hishamuddin bin Mohd Ali.



Sementara itu, Pengurus Bersama IBIMA Ke-20, YBhg. Prof. Madya Dr. Mohd. Rafi Yaacob, berkata, melihat kepada perkembangan semasa, perkongsian strategik antara UMK, UTM dan IBIMA akan memberi manfaat kepada semua pihak dalam menyediakan pengalaman berharga menganjurkan sebuah persidangan berindeks di peringkat antarabangsa.

Beliau menambah, selain itu, persidangan ini akan memberi peluang dan pendedahan kepada penyelidik muda untuk membentangkan kertas kerja mereka dalam persidangan berindeks di peringkat antarabangsa.

"Kira-kira 130 kertas kerja akan dibentangkan dalam seminar dua hari ini menjurus kepada temanya dengan memberi penekanan kepada isu-isu dari segi teori, dan metodologinya dalam pelbagai bidang mahupun kepentingan," katanya.

Tambah beliau, persidangan itu membabitkan lebih 200 ahli akademik dan penyelidik dari seluruh dunia untuk mengemukakan kertas penuh, kertas pendek, abstrak lanjutan, draf kertas, atau cadangan.

Katanya, persidangan yang bertemakan keusahawanan wawasan 2020, adalah selari dengan hasrat kerajaan dan aspirasi UMK yang memberi penekanan kepada pendidikan keusahawanan.



"Di fakulti keusahawanan dan perniagaan, kita sentiasa memberi pendedahan kepada graduan tentang pengetahuan keusahawanan kemahiran serta pengalaman. Kami berharap, graduan-graduan kita akan mempunyai nilai-nilai keusahawanan yang membolehkan Malaysia menjadi sebuah negara keusahawanan yang bercirikan inovasi dan kreativiti," ujarnya.



Prof. Madya Dr. Rafi berkata, kerjasama dalam menganjurkan IBIMA akan diteruskan dan tidak mustahil suatu masa nanti persidangan ini akan diadakan di kampus UMK di Kelantan.

“Seperti kita maklum, Kelantan adalah sebuah negeri di Malaysia yang terletak di pantai timur semenanjung yang terkenal dengan usahawan yang berjaya di negara ini. Jika anda melawat Kelantan, anda akan melihat ramai usahawan di negeri ini adalah di kalangan wanita,” jelasnya lagi.

Pada persidangan itu, UMK dan IBIMA turut mengadakan sesi menandatangani memorandum persefahaman (MoC) yang ditandatangani oleh Prof. Datuk Dr. Raduan dan Prof. Madya Dr. Khalid.

Oleh : Syarimie Woseley / **Foto :** Azam Razi / **Hebahan :** berita@umk.edu.my